


六十四件
無頭血案

黑飯店



達圖書供應社刊行

六十四件
無頭血案

黑飯店

王巡撫私訪黑夜飛頭案

去襄陽之西。可五十里遙。有古賢鎮者。居民百餘家。多以耕爲業。以其地與助縣鄰。爲往來之孔道。行商經此。輒作勾留。故鎮中設旅店以款過客。亦有數處。當有清道光辛酉歲之秋暮。鎮之西北隅。忽發現男子頭顱一顆。血肉淋漓。爲狀至慘。鎮中人俱不知何所從來。且死者爲誰。茫無識者。罹此橫禍。羣相稱詫。聚訟紛紜。有地方責者。乃據情以報有司。時巡撫鄂省。適爲王文簡公。治事廉明。有青天之號。得報後。卽偵騎四出。限期獲究。而出牒月餘。迄無要領。王以人命重案。月久懸擱。中心殊焦急。而差役因循。行將無獲破之一日。於是決意私行察訪。誓懲此兇。於夜間卽便衣減從。潛行出署。巡往古賢鎮。暗中探詢。先是有晉人李志道。業珠寶商。自荊州來襄陽。道經斯鎮。天色已暮。遂止宿於賈大房。賈大房者。蓋爲鎮中最大之驛館。主人招待。殊極殷勤。李亦安之。而不知危機將發於頃刻間也。蓋李之來。已有數盜悉其行囊。尾之至古賢。亦宿賈館。盜故與主人狎。遂與共謀。且許以均分所獲。主人利其多金。遂亦諾之。惟衆盜至夜半。卽持刀來李室。迫其出所藏。復負之越牆出。至鎮邊無人處。乃殮斃之。以爲無人知矣。賈大房有侍役。名張二。人殊勇敢。初不知主人與盜謀。夜間聞客室有嘈雜聲。卽起以探究。竟伏窗外。於隙處得盡窺羣盜迫李狀。繼又見衆負之行。心知有危。將趕往援。祇以強徒殊衆。且各持利器。未可輕犯。姑尾之行。以覘其後。至村盡處。見衆喪厥命。不禁失聲大呼。盜聞聲。疑有人來追擊。亦大恐。急負李尸行。而頭墮於地。不及拾。匆匆他遁。張二見盜去。祇餘一頭在。苟揣之返。必以召禍。遂不敢過問。逕旋寓。翌日。天方曙。卽擬以昨夜事。述之主人。行及室門。乃見有數人坐其中。與主人竊竊私語。形殊曖昧。更視之。蓋非他。卽夜間

刃李刼金諸強徒大駭。急退去。恍然有所悟。恐禍及於己。且以生計所關。乃不敢揚聲。已而咄咄頭顱之奇事。已傳聞於一鎮。張雖備悉其詳。終不敢吐露半言。捕役於此子然獨存之頭顱。竟莫能得其端倪。及至王巡撫來鎮私訪。適亦止於賈大房。張二爲侍。夜間不寐。偶談及斯案。王固有心探訪者。卽詭謂李曰。此案之生。今已月餘。未能破獲。聞省憲甚焦急。願出千金爲賞。有往報者。可以立而致富也。李曰。有千金賞耶。則吾……言至此。復止。王觀其狀。殊有可疑。然亦故作無意態。徐徐言曰。千金重幣也。知而不往報。此人亦大愚。且吾微聞人言。此案之主動。仍在鎮中。設一旦案破。則株連必夥。曷若此時陳案告發。則不僅可得重賞。并能脫己之危險於無形焉。李曰。雖有知者。奈其不敢自訴官廳。何。且金亦不易致。若事不成。反有害耳。王聆其言。似已意動。卽驟語之曰。汝固知耶。請有以告我。我當爲代達諸憲。所得賞金。我卽取其什一。以助茶資。餘者悉歸君。以爲何如。李二曰。我亦僅知一二。先生能代告發。乃最佳。惟事必由先生主。勿使人知我牽線內幕。免妨及生計。而召外禍。至賞金。則我略有沾潤足矣。王曰。善。遂與李促膝坐。李卽埒耳與語。俱道曩之夜所見。王故咋舌曰。汝隱案不報。罪誠匪輕。今幸早言。不然。事發。汝與盜爲夥。何能避嫌。禍及於身。蓋未可知。明日我卽詣省。巡撫必將以兵至。捕爾主人。爾可於茲盡嚮導責也。李二唯唯。時夜已午。王卽囑其出室。已亦就寢。次晨。卽匆匆返署。率差遣多人。親來捕賈。適羣盜亦俱在。遂得盡獲以還。審訊時。卽以李二爲證。盜出意外。咸無可語。一鞠而服。案乃大白。當時之人。莫不盛稱王巡撫之善於私訪云。

■ 聶知府判斷雙頭真假案

『兩個人頭……兩個人頭……』此種聲浪。出自一旅館之客室。室中衆人雜沓。羣注視於一雙人頭。驚慌失措。主人倪三山。尤駭怖。蓋死者爲旅客楊子經。其外復有一不相識之首級。益令人疑雲層層起。不可思議。無

已。鳴官請驗。時河間聶國貞方知是府。聞報亦殊詫。知情節必複雜。雅不敢忽視。而以三山爲人忠厚。有長者風。故不疑其殺人。除令差役偵捕外。乃集署中諸幕友。共謀所以判斷之策。顧都以斯案突兀。莫能得厥要領。遂延緩日久。而終未嘗破獲兇犯。聶心實耿耿然。日以爲憂。一日晨興。瞥見案側有函一件。猶固封未啓。聶頗稱異。卽展而閱之。其辭云。

楊子經於逆旅。彼慘殺案。發生多日。至今未能破獲。雖然。苟我不自發。恐此案終無大白於天下之希望也。我念君日夜愁思。不忍更緘默。特縷晰爲君道之。幸毋駭也。我有同門程以道者。精諳武藝。而性甚貪暴。嘗聞子經有玉扳指。爲希世珍。屢思盜之。輒爲我所阻。願莫能償。某夕。彼持刀他往。我固知其將謀不軌。因陰尾之行。彼果已偵知子經居逆旅中。逕入其室。我方欲勸其返。勿爲此不義事。而彼竟先殺子經於床。次我乃大憤。以其越貨殺人。誠我黨之敗類。立卽飛劍誅之。夫除暴懲兇。本我輩份內事。今子經雖死於無辜。差幸以道已被殲。足以償其一命。特歷述原委。以與君知。俾可了此一重公案也。

嫉惡白

聶閱竣。始知此案之由來。擬卽據斯函宣判。以寢其事。旣思嫉惡除兇暴。尙任俠。誠有倖於世道。不可多得。然來函胡不述其姓氏及居里。且旣有心自發。則此案發生之日。亦應陳辭。何乃遲遲至於今茲。始突然以函來。卽是日夜愁思。實未現於辭色。彼非署中人。何從得知。由此以觀。顯係故施狡猾。欲藉此寢事免究。實則欲蓋而彌彰也。聶旣以此函爲不足信。故對於楊案。仍積極謀澈底之破獲。惟不露於聲色。如斯未得頭緒者。又閱月餘。某日。聶以拈香外出。乘輿越街衢。忽聞一人大聲曰。我馬嫉惡慣雪不平事。聶聞嫉惡名。有所觸動。卽命皂役拘之。返署。立時鞫訊。彼面無懼色。且厲聲抗曰。吾一生無虧心事。惟以使義爲尙。而太守反加罪。何也。聶亦嚴斥曰。汝處處假冒爲善。惟吾能窺破汝之隱謀。前之來書。吾已知汝意之所在。且所爲者。吾亦盡悉。汝今日可眞言。毋稍隱。免皮肉受苦也。嫉惡曰。凡太守所言。小人實一無所知。何日敢呈書府中。小人未有如此事。聶猶笑曰。事已至

此猶得抵賴耶。且觀汝以書爾更何辭。卽命侍者持函至。擲向嫉惡。嫉惡閱畢。伏地稽首曰。此函實非小人所書。太守若不信。請驗筆跡。則不難立白。聶允其請。果不相符。卽謂之曰。字跡雖不似。或者倩他人染翰。亦未可知。嫉惡辯曰。此實冤甚。若能寬我以三日。我當得作書之原人以投案。苟不我信。以我爲圖遁。請先押我之家屬。以爲質。設我三日不來。卽盡殲之可也。聶曰。可。遂復釋之去。越兩日。嫉惡果重來。并有一人隨於後。視之。乃倪三山。聶詞之曰。與彼來。將何爲哉。嫉惡不語。三山卽自投案前跪訴曰。前函乃我所爲。嫉惡者實冒我師叔之諱。然我以此函必能止訟。脫我之殺人罪。而不意太守精審。乃若此也。聶曰。然則殺子經者。必爲汝。汝其速承。三山慨然曰。大丈夫作事。磊磊落落。吾至今日。絕不少隱。蓋我前見子經入我室。手御一玉扳指。極可愛。欲得之。乃於夜間持刀入其室。將盜爲己有。子經雖寢。猶未入夢。時有咳嗽聲。吾懼爲所窺。卽飲刀斃之。搜扳指而出。適有一新來客。自牆下過。吾又懼其揚聲。敗我隱事。復殪之死。以其首級俱移一處。所以如此者。實欲滋人之疑竇。而爲我投函之張本。今事已大白。吾亦無悔。請置我於法。與我師叔固無干也。聶察其情實。遂論償罪。其後嫉惡言。倪三山前曾於綠林中也。

汪知縣破獲人皮刀鞘案

成都汪士倫。以進士第。出宰浙江之蕭山。廉潔愛民。公正無私。有獄必折。有冤必伸。民望之如父母也。某秋。歲大歉。汪以平糶放賑事。晉謁省臺。旣返矣。中途天晚。止於驛館。旅店中人以其裝簡衣陋。不知其爲縣尹。故甚忽視之。而汪亦不以此介於懷。坐斗室中。良苦寂寞。乃負手出戶。就行廊徐步。藉資消遣。列廊皆窗牖。宛若蜂房。悉以居旅客者。汪行至最末處。忽見一室內。壁懸一刀。厥形甚闊。外加一鞘。似皮製。色淡黃。而質細。又若布爲者。汪頗不知爲何質。因思僕從張勝民。精諳武藝。素與此類物近。當能辨悉。於是召之來。就窺同窺。勝民大駭曰。此人

皮刀鞘也。佩此者必殘暴過人。汪曰：然則居斯者，或爲劇盜，竟未可知。汝今夜可察其舉動，苟有越軌，則捕以返署，亦可以除民害耳。勝民唯唯。已而有客自外來，厥體碩長，爲狀殊悍，逕入末室。勝民陰伺之，旣而謂汪曰：吾觀此人，定非善類。主公可就寢，勿動聲色。吾當探知其究竟也。士倫遂返室。勝民亦更夜行衣，并藏利器身次。伏於客室外。二更許，忽有人推門入，亦着短衣，與客私語，聲甚微，不能辨何辭。惟見客頻點首，且作猶笑。移時，卽起立，取壁上刀佩腰際，相將出門，登牆而逝。勝民悉見之，竊佩其藝之精，擬卽追蹤往。第恐爲所覺，不能敵，則事立敗。乃重至汪所，以頃所觀者盡述告之。且曰：觀其狀，則爲暴客，可決無疑。第我一人不能雙獲，返以速其他遁。吾意彼旣居斯，明日當不致驟去。主公返署後，卽多差卒役來捕，必可獲也。士倫以爲然。翌日黎明，匆匆返署，卽精選皂隸來，以勝民爲前導。彼客果以夜間失眠，倚案假寐。勝民逕取之，以鐵索加其身。客始覺，尙欲圖逸去，然已被擒矣。乃任衆擁之行。勝民至門首，見櫃內一人，方戰慄不已。其體態頗與昨夜短衣就客私語者相似。卽亦捕以俱去。彼曰：我設旅店，以款行商，未嘗違法，請勿累及也。勝民不顧，強挾之行。旣至署，士倫出審。客曰：我業盜半世，未嘗入於官，今無意被捕，此數也。請速我死。胡問爲？汪卽呼旅店主人至。客又抗聲曰：彼雖業商，亦以劇盜爲正營生者。語未終，時勝民適以人皮鞘刀呈上。汪接而視之，見柄端鐫有半夜客三字，不禁叫絕曰：汝卽半夜客耶？正我懸案數年，未能拘捕獲之劇盜也。於是亦不暇更訊，卽據情以詳省憲。不數日，乃置二人於法焉。

李巡撫調查箱屍塊肉案

武陵盛生，字宏川，少孤貧，有叔父某，經商潮州，頗足自贍，遂往依之。萬里長途，以一箱自隨。其蕭條景狀，殊可憫也。日旣暮，行抵一村，乃就旅店止宿。村中風景頗佳，生夜間居室，苦於寂寞，卽徐步出戶，觀覽消遣。至興盡返，寓體已勞憊，擁衣而臥，酣然入夢矣。翌晨興起，時已日上三竿。生以前途正遠，不克勾留，遂僱宿資，提箱匆匆去。

陸行數十里。將由海道進。時輪航初通。關禁良嚴。行裝上下。必須查視。生之箱。亦被啓驗。不意箱蓋甫揭。已有血湧流出。內所藏者。悉爲刀砍成塊之屍體。生觀狀大駭。目瞪口呆。不知所措。而驗者已譁然起。謂如斯慘殺。竟圖逃逸。於是一聲呼么。鐵索郎當。已加於生體。生雖被冤。顧鐵證在前。即百口亦無能分辯。祇得聽衆捉將官裏去。邑令某。固黑藉中人。忽視民事。以生證據確實。顯係行兇圖逸。遂亦不加詳訊。即據情以報省憲。擬處極刑。時李仁民。方巡撫浙省。得報文。亦深怒生之枉法妄爲。將准所請。繼思宏川以一介儒生。且年事至輕。當不致殘忍如斯。或有別情。難乎其中。亦未可知。人命重案。不能不慎加審察。於是即行書該縣。提盛生來省親訊。李見生溫文若女流。不類暴徒。意已稍解。嗣責其箱屍塊肉。何所自來。生遂歷述離家宿旅之種種經過。言次。且以首叩地。碎然作響。以表其誠。李曰。汝賊證俱在。罪無可道。姑置諸獄。以俟後判。生由是復飽領鐵窗風味。以爲輾轉官署。辯白無由。萬無生理矣。實則李暗中偵察。固未嘗稍忽略也。日者。李復得某縣詳文。謂有商民朱某。出門一夕。即不知蹤跡。其家屬呈請追究云云。李閱竟殊詫異。亦即命朱族來省。訊其究竟。其妻供謂至鄰邑購物。未見返室。詢其所經。則爲某村。蓋與盛生所止居者同。李似有所得。復語之曰。汝夫去。隨身攜何物。亦憶之否。朱妻曰。伊帶現金近百元。更有儂之珠鑽一隻。蓋以攜市配購成付者。李頻領首。溫語慰之曰。汝姑返。我當爲汝偵獲。不致日久冤沉也。朱妻叩謝去。李即傳盛生出。詰其旅居客館時。曾否見一朱姓客。生慎答曰。小人旣止店。以彼村風景甚佳。卽外出玩賞。至興盡歸來。而身體疲乏。擁衣而臥。明日復匆匆就道。未幾。乃被捕。他客實未嘗得見。李曰。然則汝夜間返寓。曾檢視箱籠否。生曰。力憊身嬾。亦未一啓。次日。至海濱。乃有屍塊盈其中。實冤甚矣。李沉吟半晌。始徐徐曰。此案吾已略得端倪。水落石出。當在數日間耳。復押盛生歸獄。已退諸內室。乃改其服飾。作行商狀。攜一僕從。潛行出署。往某村。止於旅店。主人夜間來。詢客何所業。李詭稱曰。吾係珠寶商。現有某貴人妾。欲置珠鑽。今僅有其一。欲得佳品爲配。特命吾訪購。殊不惜重金也。主人聞言。似欲有所語。而訥訥不卽吐諸口。李乃趁機曰。

君苟有爲吾設法求之。亦將不吝重酬。主人曰。吾雖有一枚。不知能及選否。李曰。何妨與吾一觀。主人遂去。攜一錦匣至。李受而視之。一珠果極燦爛。乃力讚曰。此品大佳。足以爲配。第不知索價幾何。主人曰。吾亦僅此一粒。係祖所遺者。君若合意。請給百金足矣。李曰。可。請先善藏。我明日當偕貴人妾攜百金來取。切勿更售他人也。主人諾之去。李亦就寢。明日晨。卽辭去。復謂主人曰。我去與貴人妾取金來。請以珠鑲待。主人復欣然諾。李去後。匆匆返署。卽招朱妻至。告以所觀。并命其飾貴人妾。與己往驗。彼珠鑲是否。所失物。復命差役多人。隨行。先伺旅店外。隨時應招。佈處既定。卽與朱妻入內。主人見李偕一貴婦來。知爲取珠者。卽趨前來迎。李曰。趨取珠出。主人唯唯。捧昨夜之錦匣至。朱妻啓而視之。駭然作色。頻以目顧李。似表示此物卽已有者。李已會意。卽詭曰。汝於此稍待。吾去小解。當卽來。於是外出。招其從者至。捕主人蜂湧以行。主人知受計。然已無及。既至署。李卽詰其珠鑲何來。主人初猶詭辯。嗣知朱妻爲原物主。已無可諱。於是實承。蓋朱來投宿。以珠鑲值甚巨。恐爲宵小覬覦。卽存諸櫃。以求保全。主人思攫取之。乃斃其命。而以尸身實盛生箱內。時盛適外出。遺箱於室。遂得以假禍於人。計亦良得。而不知終至破露也。李旣得實。乃釋盛生出獄。并出金助其赴潮。以旅店之主人定讞。償朱之命焉。

杭鐵頭偵探地窖藏金案

杭鐵頭者。初姓季。名金奎。爲浙之杭州產。具內家工。能以顛碰石。石裂。而顛猶完好。職是故。人乃以杭鐵頭呼之。其真姓名。知者反甚鮮焉。初嘗爲盜。縱橫大江南北。劫富以濟貧。頗有古俠風。嗣爲同輩所忌。幾遭不測。乃棄其故業。入西楚。投黃岡縣爲捕役。彼固個中健者。凡有巨案。無不擒獲。其易且如探囊之得物。故爲之主者。莫不依爲左右手也。邑令姚某。以鐵頭忠直。猶優容之。鐵頭殊感激。服務益勤。會姚以他故去任。將之燕。行裝甚夥。半迷恐遭崔苻。乃謀之於鐵頭。鐵頭本欲護之往。而以邑中事冗。不克離職去。意殊躊躇。時其子少奎。年已及冠。日

常使拳棍。得諸家傳。技亦不弱。惟不若乃父之精耳。鐵頭卽命之送姚行。并囑妥爲照料。少奎固未經世故。年少負氣者。恃其藝。遂目空一切。而以保鏢自任。姚以其爲將門子。亦有恃而無恐矣。日者行抵魯境。天將暮。而山嶺環抱。無村落足供止息。遂兼程前進。冀得早達驛館。忽樹林深處。人聲譁起。姚料有盜截去路。而無人色。欲從小道遁。少奎盛氣曰。是烏足恐。有某在。當使鼠輩盡血吾刃也。言已。卽奮身前往。趨與盜搏。盜固甚衆。數十人圍擊少奎。而分其餘搶物去。少奎始知中其計。急衝圍出。馳往奪回。然已無及。復欲探盜巢穴。殲其衆。俾珠返合浦。而盜防備甚嚴。不得趁。乃星夜旋楚。以告其父。求有以援助。鐵頭曰。是蓋汝輕敵之過也。然鼠子亦可惡。事旣至此。我不能縱鼠輩橫行而無所懲。次日。卽以職事託諸友。逕來魯。少奎領之近盜所。鐵頭見崗巒重疊。形勢殊險。要非夜間不足以窺其祕。乃與少奎先他往。至夜午。始攜利器行。而勿欲少奎偕。恐其少不更事。致多擾也。跋山越嶺。旣及盜窟。屋頗寥寥。僅數椽。蓋爲古廟。其徒黨率宿於巖谷。以布爲障。廟之四週。復有衛守甚衆。設不慎。將爲所緝。於是聳身升屋上。以窺其內。而佈置殊簡陋。無箱籠。足以貯金帛。列室皆然。鐵頭因思彼旣搶多資。以此虛無所有者。將存於何所。抑別有祕藏所耶。若得探知其窟。不難攫原物返。設不然者。徒以力爭。彼衆我寡。則取勝匪易也。思至此。卽悄然躍下。蛇行室中。而尋覓殆遍。渺無所覩。心殊悵悵。已而忽聞隔室有人語聲。乃輕移其步。詣窗外竊聽。懼爲所覺。適庭前有巨柯。卽揉捷以上。以樹葉蔽體。引首下窺。囑室內頗瞭然。見有二人互語。狀殊雄桀。聲低微。不能辦何辭。惟頻以手指床側。爲態至愼。未幾一人卽拽床過。揭地板。得一穴。探手其中。取一紙簿。出就案上。翻閱良久。復以藏穴內。乃去別室。其一卽就床睡。時夜已闌。東方將吐魚肚色。而廟外之巡邏者。且益勤。鐵頭恐久留爲所覺。遂疾遁去。衆盜固無一知也。鐵頭旣返。謂其子曰。鼠輩藏金地窖。吾已偵知。今當與爾往。擲爾其愼之。少奎唯唯。鐵頭復假寐。蓋夜來未寢。年老身殊乏也。至午后。日將西落。始躍而起曰。可以行矣。卽挈少奎往。至盜所。盜果他去。卽有守者。亦多殘弱輩。少奎甚詫其父何以知盜適出。而以時來。其實鐵頭固深悉草

莽習慣。凡欲出規行商。率以黃昏時行。故趁其虛以來耳。二人見盜窟已空。卽持刀逕入。雖有者而當此輒靡。無以倖免。餘衆遂望風逃。莫敢前攔其鋒。鐵頭益無顧。尋至昨夜所窺室。掘其地板。窟內纍纍然。燦燦然。果皆黃白物。刼自姚者。猶封存未動。少奎先取之出。并及其餘。儘力負之行。方及門。而衆盜已紛紛返。鐵頭於是挺身前。揮刃相迎。少奎亦釋其負。助父與羣盜鬥。盜中雖有強者。而藝弗如鐵頭遠甚。且有少奎爲助。盡披靡。鐵頭察其中之魁。猛以頭觸其胸。魁不及備。蹶數丈外。觸岩上。竟喪命。羣盜見魁且死。大駭。逃亡殆盡。鐵頭亦不更擊。復返諸廟。出地窖所盡藏。盜故有數騎。遂以備之行。檢姚所失者。悉返之。而以其餘濟地方之貧民焉。

女劍俠大破八卦黨吃人肉案

一線殘陽。射照瓦屋山之峯。作淡紅色。斜陽古道中。風聲蕭蕭。更雜寒蛩之悲鳴。秋深日暮。益悽然動人哀思。時有女子。年不過十七八。面目姣好。而嫵媚中尤有英武之概。短衣窄袖。矯然立於瓦屋山巔。游目四矚。時作微吟。一似吊此風光。而興歐陽子之懷者。已而忽見數百武外。一村落之附近。有強徒數十人。擁一少年行。少年行且泣。不願隨之去。衆乃肆行毆擊。爲狀至暴戾。女子觀而大怒。雙目赤裂。奮然作色曰。何處鼠輩。敢猖獗乃爾。我紅四娘。慣雪不平事。不能袖手作壁上觀。而縱若輩橫行也。言已。卽縱身躍下。行將往援彼少年。我於此敢先舉斯女之來歷。爲閱者告。俾知原委。蓋所謂紅四娘者。卽女子之名。產自魯東之卽墨縣。爲著名鏢師曾金龍女。金龍暮年無子。僅四娘。愛之逾恆。遂以其術盡傳授之。而個妮子生具慧根。習藝極敏。故青出於藍。較之乃父有過無不及焉。後金龍年老。以病歿。妻旋亦逝世。四娘既無叔伯。終鮮兄弟。子然一身。遂棄家作雲游。名山巨川。蹤跡殆遍。每遇民間危困事。輒捨身以從。扶弱濟貧。豪俠好義。巾幗而鬚眉者也。日者登瓦屋山。見諸暴刼少年。狀復動其俠念。一躍往救。山之麓。適有一樵者。鬚髮皎白。垂老矣。見四娘以往弱之女子。隻身自高山下。寂寞荒郊。恐

遭不測。卽來迎止之曰。娘子獨行山間。不畏野獸噬耶。不畏強人害耶。此去多危窟。幸留意也。四娘曰。謝丈盛意。然儂慣野行。苟有所懼。當不來此耳。言次。復欲前進。樵者急來阻曰。此路決勿可去。娘子不觀前面已有數十人至。若輩乃八卦黨。徒強且暴。苟爲所遇。必無倖矣。四娘曰。何謂八卦黨。丈亦能爲我告歟。樵者曰。娘子且隱身石次。免爲所見。致召橫禍。少俟。我當爲爾語其詳。四娘見樵者意出至誠。不忍重違其言。卽據石下坐。惟頻以目外探。窺衆何所向。不移時。強徒已擁少年折他往。距山麓漸遠。四娘向樵者曰。賊已遠去。所謂八卦黨者。請速爲儂道之。樵者曰。此事殊非片言所能道其詳。娘子欲聞者。曷往吾宅。且天已垂暮。此間亦不宜久留也。四娘諾。於是隨之行。不半里許。於巖谷深處。得一茅舍。樵者卽釋其薪。啓扉延四娘入。已乃據門限坐。出烟斗燃燐寸。徐徐吸之。半晌始語曰。八卦黨者。此間劇盜之名稱也。其黨魁名蔣瘋子。本設旅店營生者。以其屢犯越貨殺人案。不能安於市。乃流爲寇。顧其徒黨夥。羣奉爲主。行劫鄉間。凡被搶之戶。輒留一八卦圖。以作標誌。卽不更來。以是人遂以八卦黨呼之。官庭雖知之。而其勢極盛。莫能如之何。彼黨遂益無忌憚。作奸犯科。人民之受其塗炭。不可數計。而自去年春季。蔣妻蔡氏。忽得心痛症。必飲生人血。始能止其疾。蔣乃令其黨時劫路人宰殺。以血飲其妻。而肉則供庖廚。爲己佐餐。其殺人較之雞犬。殆猶弗如。卽今日之擁彼少年行者。或亦將茹其肉也。四娘曰。如此殘忍。誠所罕聞。有司縱之行暴而不懲。然則地方之人。亦能忍其如此。不思所以剷除之耶。樵者嘆曰。肉食有司。且不嚴究。曷論小民。矧彼黨羽翼實衆。稍不慎。卽爲所陷。孰敢撓其鋒哉。四娘奮然曰。亂臣賊子。人人可得而誅之。見義勇爲。我輩責無旁貸。儂誓不能留其若斯猖獗也。彼黨巢穴在何所。丈亦能知。舉以告我否。樵者曰。娘子雖勇敢。而蔣藝亦良精。且彼徒黨衆。防範嚴。恐不易與格。其巢穴我果知。然不願爲娘子告。恐反自陷耳。四娘曰。丈請勿復爲儂憂。彼等實鼠輩。無足慮。速以地址語我。行往盡殲之。樵者見四娘嫉惡如仇。雅佩其俠義。遂告之曰。去此西行五六里。有茂林一叢。中有屋。卽蔣所居。娘子須謹慎將事也。四娘唯唯。拜謝出。疾馳至其處。果如樵者言。

即登身升屋下。探首下窺。見室內一雄桀之男子。與一婦對飲。載笑載言。厥狀殊適。四娘料爲蔣與蔡。方擬躍下。斃其命。時適一人牽日間被擒之少年至。繫諸樹下。蔣遙呼曰。速宰之來。供吾等啖嚼。彼人應聲諾。方抽刀欲洞少年腹。四娘急出飛劍斃之。復發其二以刺蔣。顧蔣已有覺。疾引身避。遂中其妻。蔣知敵人在屋頂。亦來迎擊。躍方及簷。四娘已舉足蹴之落。趁勢隨蔣下。舉劍砍其顙。其餘衆已聞聲至。顧悉莫能爲四娘敵。當者盡披靡。遂紛紛竄散去。四娘即釋少年返。以火焚賊居。一方之巨患。遂爲所除矣。

老俠客破除黑虎黨殺人案

燕趙之間。多異人蹤跡。有清雍正時。劍仙俠客。尤稱盛國中。野史家之記載。詳且備焉。然其來往。恆有令人莫測神妙。是則事過時遷。其慷慨激昂之行爲。湮沒而不彰者。實繁有徒。如吾所記之老俠客破除黑虎黨殺人案。亦幾爲滄海之遺珠也。齊魯之東。爲劇盜出沒之地。殺人越貨。相習成風。肉食者鄙。充耳若無聞焉。有黑虎黨者。初不知其意何所存。或曰。黑夜殺人。其勢如虎。遂得名。斯說也。庶幾近之。凡魯之業盜者。多爲黨中份子。其勢益張。犯案益夥。人民爲之塗炭。乃益甚。然籲呼無門。敢怒而不敢言耳。黨魁賴元先。頗具內家工。祇以淫慾甚。技乃日衰。而衆人懾其威。奉之仍如昔時。賴性復嗜杯中物。每日必飲。飲必醉。殺人乃如草芥。古人謂一顆人頭酒一鍾者。不啻爲賴詠也。一日午後。賴騎馬郊原圍獵。消遣。忽一老者立於前。皓髮如銀。狀至可親。盈笑語。賴曰。子即賴元先耶。聞爲斯間劇盜之巨魁。夫男兒不能選及干城。爲國家作柱石。卽宜行諸草澤。除暴安良。子之所爲。吾實無聞。第吾輩處世間。應爲人民作保障。而不可視之如魚肉。若旣刼其財。復喪其生。彼果何辜而罹此。子之所爲。鮮有不如斯者。不將悖乎吾道乎。然而旣往不諫。來者可追。放下屠刀。立地可以成佛。子今後當知所戒。亦足以補前愆。若更怙惡不悛。明知故犯。則禍患之來。且無日矣。子其慎之。言已。掉首而逝。瞬息無蹤。賴聞語。呆然無

言者良久。既而曰。何物老奴。敢預乃公事。苟非速遁。爾顚且去頸矣。於是復縱馬前進。至輿盡始返。老者與所言。匪特不能從。日久且亦淡忘之。而他人亦不敢與言此也。兩月後。附近村間。一旅店之門次。忽有屍體一具。而無頭。居者察其服。知卽爲賴元先。衆意大快。而殊詫其異。卽鳴於官。有司亦知賴之行。頗樂聞其死耗。遂置案不爲究。後有知殲賴者。卽郊原與語之老者云。

張捕頭捉拿飛毛腿血案

張捕頭。武林產也。年四十後。始業捕。其幼時。蓋爲農家子。早失怙恃。有叔某亦貧甚。乃傭富宅爲牧奴。富於胥力。每與羣兒鬥。莫能爲之敵。以是強於操作。深得主人歡。一日驅牛山間。體倦甚。卽就樹蔭下假寐。而繫牛於幹。懼有失也。及醒時。已日落崦嵫。暮鳥投林。正擬驅犢返。而揉開睡眼。牛已不知何所往。大駭。因思近山向無盜賊。何致有失。或者脫繮逸去。行當不遠。遂卽往四處覓跡。而尋遍荒山。杳無所獲。維時天已沉暮。張懼返去。必受主人呵責。正踟躕間。大雨傾盆。又沛然而下。張益倉惶失措。思此深山長夜。我將安歸。且烏雲密佈。益黯然莫辨。東西暴雨淋漓間。時有雷聲電影。凜然懾人魂魄。張於此。急智忽萌。見電影閃過。卽趁其餘光。急奔數十武。如斯者屢。已不知路之遠近。移時雨止。心始稍慰。然初時祇計跑避。并未辨所向。此時身來何境。夜色沉沉中。更茫然不知。而牛去無蹤。卽悉歸途。亦將不能再返。主人所。遂大懊喪。竟伏地啜泣。忽有履聲自遠來。一偉丈夫行過。厲聲語張曰。何處小子。在此啼哭。果有甚事。而傷心至斯耶。張見有人問。頗思得援。乃據情以告。偉丈夫曰。是何傷。曷至我宅。明日當尋爾牛送爾返可耳。言已。挈張起。張正顚沛無所從。卽亦隨之去。行里許。已及室。茅舍兩楹。殊狹隘。居亦無他人。僅偉丈夫。壁上懸刀箭幾滿。張頗疑懼。以爲是蓋劇盜窟耳。然旣來此。不能更脫去。姑坐以待其究竟。已而偉丈夫攜一盃來。授張曰。爾腹諒已饑。曷食此。以果腹。張果已餓極。不辨何味。頃刻食盡。彼又指地下。

曰。爾體諒已疲。曷睡此。張復唯唯。偉丈夫乃一笑滅燈去。翌日晨起。張偶取壁上所懸劍把玩之。爲偉丈夫所見。卽曰。爾愛此耶。亦欲習之否。張欣然曰。固所願也。不敢請耳。偉丈夫曰。爾苟願學。當不能更返。凡事必遵我教。毋或違。設不然者。將不爾授也。張卽伏地曰。孺子敬受教。雖痛施鞭撻。不敢怨也。偉丈夫笑諾之。由是張卽居山間。不復返。而偉丈夫并不教之藝。惟每日於微明時。以一大縱山中。使張擒之返。張初習此。奔逐至終日。竟不能獲。至半年後。始可應手得。偉丈夫曰。可以進而習其他矣。乃漸漸教以拳棒及刀劍之類。而有暇。輒命馳趨曠野。以是足捷。竟似飛。如斯者數年。藝亦大精進。一月。偉丈夫語之曰。汝藝已足自給。可以離此去矣。第天下異人多。爾勿以此自負。致受辱。此去。猶必爲人民謀幸福。勿恃勇凌人。其謹誌之。三十年後。我與爾尙有相見機也。張唯唯。再拜而去。既下山。本已去家鄉遠。卽亦不更返。輾轉至燕。時李合肥方練新軍。張遂投戎以剿匪。嘗立奇功。嗣因慙直。觸長官怒。探被逐。張仰天嗟曰。吾具此好身手。而不能用於時。斯亦命也。然行俠江湖間。亦安見不能爲民作保障耶。於是浪遊秦楚間者有年。扶危濟弱。專以豪義爲己任。人民受其惠者實多。旣思有叔在里。積二十餘年。未得一見。意良憶念。乃馳赴故鄉。而白雲蒼狗。變幻無常。家中已非復舊時景况。叔已亡。婦猶健在。言談往事。恍如夢境。不禁悲喜交集。鄉中長者。固知張當年走亡事。聞其返。咸來問訊。因悉張得異人傳藝。互相傳說。竟爲太守羅公仁明所聞。時杭垣方患盜。羅卽使人張羅至。畀以捕頭職。而張鑒於前此投戎影事。初不願任。太守邀之堅。不克固辭。遂允焉。不半月。城西華明鎮某逆旅。忽以重案來呈報。謂兩日之前。有客來投宿。越夕。乃失其頭云。仁明得此。頗棘手。知案情重大。非張莫屬。卽命其星夜馳往。察獲兇徒。張先至華明。殊無所得。乃坐茶肆間。忽聞一客語曰。前數日。飛毛腿曾至吾鎮。而一夕卽不見。何來去匆匆也。張心忤然動。蓋素聞飛毛腿名。爲近處劇盜。今來鎮。或與此案有關。繼又聞一客曰。飛毛腿所居。距此僅百餘里。彼瞬息卽可至。故覺其條來而條往耳。言已。兩人卽他去。張陰尾之行。至僻靜處。驟執而語之曰。汝二人頃言飛毛腿事。我已盡聞。其速以彼之居所告我。

否則不爾恕也。其一駭然曰：吾等亦不過偶然道之。其居處在鎮之西，向大寶山下。汝可自尋之。切勿擾我等良民。張聞其以實告，卽揮之去。逕往大寶山。方至其地，卽有一人迎來曰：汝至此，將擒飛毛腿耶？是亦不難。吾前奔爾，苟能追及者，則吾隨爾去可矣。張笑曰：鼠子敢大言乃爾。老夫姑與汝試之。誓必獲汝去，勿自悔也。飛毛腿聞言，卽掉首疾馳。果健捷若飛，轉瞬間已去數里外。張頗服其藝，而恨其行亦追踵往。蓋張幼時習業山中，實以捷足爲能事。故頗不較飛毛腿爲弱。然終不能越其前，競逐至半日，相去猶有數尺，不克驟及。兩人力俱憊，飛毛腿行稍緩，張固擅運氣工。至此，鼓其餘勇，猛躍至前，竟追獲之。飛毛腿伏地曰：吾以雙足橫行大江南北，有日矣。而未嘗有及我者。今見君藝，實令人驚佩。吾有言在先，敢不踐前言。請攜我入官，死無悔焉。張殊嘉其志，第以其犯案重，卽縛之至署。太守遂定獄焉。

趙捕快偵查分屍雙腿案

大道之旁，有屍體焉。無頭，無上身，僅兩腿。血跡模糊，慘不忍觀。且有羣蠅集其上，腥氣聞數丈外。烈日炎炎，下圍而觀者數十人。咸咄咄稱爲怪事。以爲此地不近村，不近鎮，去城亦遠甚。此突如其來之半截屍身，果何自而降耶？其老成而具識見者，則皆曰：事關人命，情節必曲折，或被仇家所暗計，或以懷璧而罹災。要非我等庶民所能忘涉。必報有司來驗究也。衆唯唯。明日，邑有長官果臨驗。顧於此突兀之命案，亦茫然不能得頭緒。真相無以明。時有捕快趙拿雲者，雖無奇技，而爲人殊機警。往往獲巨盜，出人意外，殆不啻東方之福爾摩斯。令於此卽喚之前，囑捕兇手，并限日報命。趙不敢違，諾諾退下。思此屍初發現，犯者在逃，當不遠緝之，亦匪難。然而究宜從何入手？殊費躊躇。思索久之，苦無良策。頽然若有喪，乃信步行去。初未計所向行里許，經一小橋，忽見斷梁下隱然有殷紅色，照人眼簾。趙無意趨視之，乃塊然一人屍也。無四肢及頭顱，僅胸膛一段。趙駭然自忖曰：彼雙腿之屍，

猶未破。而今又見此。何近日慘殺之多耶。既復沉思有得。彼處有兩腿。而此具上身。路之相去。復不甚遠。此必一人而遺棄兩地耳。正猜疑間。又見草叢深處。有光芒射出。就視之。則爲一匕首。方俯身拾起。忽一犬奔至。向趙狂噬。趙以匕首格。且格且退却。而犬追不稍止。趙益驚疑。漸至人衆處。行者來助。犬始他馳。趙擬更至橋下。詳加察視。以天暮不果去。乃就近村一旅店止宿。方入內。而彼橋次追噬之犬。已先在。第不似前此之猖獗。頗覺莫明其妙。姑擇一室居。以覘其異。見店之主人出。犬亦隨出。主人入。亦隨入。寸步不離其側。馴馴然若赤子之依戀於慈母者。趙心殊羨焉。至夜間。偶出頃所拾之匕首把玩。他人未之覺。而犬已狂奔來。幸掩門速。未縱之入。而趙益甚。默思此犬何以一見匕首。卽噬吠。是必有別情存乎其間也。顧終莫能測其究竟。明日。詣其友雷峯處。以昨日所見及犬噬情形俱告之。雷峯沉吟曰。犬爲旅店主人所蓄。居恆甚馴。而見匕首則狂噬。斯匕首必與其主人有關係。其噬者。殆示威欲攫返耳。然匕首遺橋次。與屍身同發現。斯刀此屍者。必爲此匕首無疑。橋下之屍。僅上體。昨日驗者。適下身舉而合之。則爲全屍矣。然則汝之所欲偵獲者。當於此旅店之主人三致意也。趙聞言。恍然大悟。謂雷峯曰。吾昨日往投宿。彼卽目眈眈注視吾面。吾已疑其非善相。今證爾言。則益可信也。雷峯曰。既如此。則趨往報邑尊。遣役捕之。嚴刑鞫訊。不難水落石出矣。趙曰。然。卽辭雷峯去。至署中。以偵察所得告諸宰。宰亦以爲然。卽拘旅店主人來。指爲凶犯。邑人聞之。羣以宰株連無辜。議其荒謬。而宰卒不顧。處以嚴刑。彼亦終不承。嗣有其店夥朱二來證明。匕首確爲主人物。彼無可措辭。始自舉曰。有客云自遠方來。所攜極豐。余於夜間卽擬竊少許。初未嘗欲致其命也。而方行及其室。彼已先有覺。自床躍然起。余不及退避。乃爲所見。恐其次日聲揚。將影響其吾之營業。卽持刀往禁之。彼亦略暗武藝。見余以刀至。卽躍出窗外。更越垣去。余以事已至此。苟縱之者。隱事必爲破。余卽不能安然居此營業。不獲已。遂追之往。約數里外。彼力疲。傾跌道左。余乃砍其顱。顧猶慮其屍次日爲人見。事或敗露。擬投之水中以滅跡。而近處復無河流。故卽斷其體成數塊。以便攜往他處。方以頭及胸部攜

至河干頭已擲諸水。忽聞砰然之聲。自他處起。余疑有人至。急遁去。而倉卒間。乃以匕首遺於地。不意終以此敗事。殆亦數也。宰得供。事遂大白。卽以之定讞論抵衆至斯。亦明曲折。莫不歎破獲之巧也。

甘鳳池夜破血手印暗殺團案

江南大俠甘鳳池。爲清葉之奇人。婦孺莫不震其名。故其義行豪舉。世人多有知之。或爲之傳。或集軼事。資豆棚瓜架之談助。而於朱家郭解流中。垂千秋之佳話。懿歟盛哉。其未遇時。嘗有夜破血手印暗殺團事。悉者頗鮮。以其人微。而聞亦不能廣於世。昌黎氏所謂莫爲之前。雖美不彰。莫爲之後。雖盛不傳。良足概也。初鳳池隨師入川。旣經年。藝大精進。乃辭而東返。子身萬里。僕僕長途間。未免寂寞。差喜一路名山巨川。所在多有。足以流連。游目騁懷。亦殊爲人生之樂事。有時登高山之峯。舞劍長調。有時臨清流之源。洗纓濯足。其快不亞於飛仙也。日者且游且行。旣抵荊川境。爲時已晚。不克更前進。乃就一旅止宿。然而興致勃勃。雅不願卽時就寢。時中庭月色。一白如晝。微風吹樹柯。簌簌作響。益韻然而動人。清興鳳池默思此景。此情。殊未可辜負。曷作長夜之遊。以伴此月。白風清。且明日趕程亦勿急。正不妨遲眠以暢懷。意旣定。遂亦不爲主人告。徐步出室。至後院聳身越垣。外與居者固無一人知也。是處蓋爲鄉鎮。居民可數百戶。屋咸集於中。其外則樹木田野。阡陌相連。杳然無人跡。况於夜間。祇聞水禽時鳴。與夫遠山之猿嘯。爲此曠荒深宵之點綴。鳳池殊喜其幽絕。天然風景。雅勝於五都市上之喧囂。不禁有忘返之概。而魚鼓聲聞。村間已報三更。知時甚晏。乃歸寓思寢。仍越垣以入。方及庭院。忽於月光之下。見有血痕遺地。其色殷然。似爲俄頃間所漑滴者。鳳池見之。乃大詫。念此驛館中。旅人甚衆。何以竟有慘殺事。好奇之心。不覺怦怦然動。正擬暗事偵察。繼聞呻吟聲。來自一客室中。音且極哀慘。鳳池知有異。趨跡聲之來處。以往觀。顧室門緊閉。無由得入。僅於窗隙。見一人年可四十許。俯睡床次。圍立其側者。亦四五人。都呈雄桀狀。各持